

CGU Kohima & Kripa Foundation nati Chandmari nung health camp ayongzüka agi



Kohima, Chiteni/July 8 (TYO): Chandmari Gorkha Union Kohima aser Kripa Foundation, Nagaland nati ayongzüka Honibarnü Multi Utility Hall, GPPK Complex Chandmari nung angati Health Camp ka ayongzüka katsüogo.

Sentong nung o jembiba mapang Managing Director, KOHIMAS hospital, Dr Keneilhoulie Medom-i, hypertension, diabetes aser cancer amala tashidak tem indang jembiba, koba tawa kanga bulua kümogo.

Paisa, National Family Health Survey 2019-20 ajanga ashiba agi, tetsür shilem 22.4 aser tebur 28.47 dak high Blood Pressure keta lir aser mozü agidar aser diabetes tashidak agi tetsür shilem 9.3 aser tebur 11.9 tonger mozü agidar, ta ashi.

Paisa, sentepa aliba lokti dang mapang shia temang tendanga alitsü aser anema alitsü atema chiyongtsü tapet achitsü ajungshia liasü.

Maneni Dr Medom-isa, sentepa aliba lokti dang Chief Ministers' Health Insurance

Scheme takokba tashi agitsü ajungshi.

Kasa mapang nung Kripa Foundation nungi Ainato Yeptho-i o tatsüka jembiba mapang 'Basic of HIV/AIDS' onük nung ajemdaker jembiba aser kümtem tsungda HIV tashidak menar aika kümdar aser Nagaland tanabuba jenjang nung lir ta ashi.

Pai, mashisa aliba tetsürtem dang tanurtem dak HIV tashidak memenaloktsütsü atema mozü achitsü ajungshia liasü.

Taoba kümtem tsungda blood transfusion ajanga HIV menatepba ishika dang liasü ta shia pai temesepba mozü amshirtem ajem melentepa amshiba anentsü nungdaker ta ashi.

Paisa, tang nisung 12,300 shi HIV/AIDS mozü tegidak lir, ta ashi.

Ainato-i ashiba agi, April aser May tsungda Dimapur nung nisung 10,000 dak HIV tendang aser nisung 199 dak tashidak poteta liasü aser iba ajanga test asüba shia shilem

ana timba akümba sayur aser Kohima nung nisung 3900 dak tashidak tendangba nungi 54 dak tashidak poteta liasü.

Paisa, tashidak nungi koda pila alitsü aser mozü shidak achiba aser condom amshiba indang tangazükba agüja liasü.

Iba sentong ya CGU Secretary, Samir Thapa lenisüba nung agi, Khrievotsonuo Terhase-i sarasadem aser Chairman, CGU, Prem Kumar Thapa-i tepela o jembiba liasü.

Ajak senteper nisung 247 temang tendangtsü aser Hepatitis & HIV/AIDS atema nisung 48 tendang aser nisung 28 Physiotherapy agia liasü. Iba sentong ayongzüka agitsü atema 9th Kohima Town A/C MLA Dr Tseilhoutuo Rhütso, Gorkha Public Panchayat, UPHC Porterlane, Sun Pharma, NSACS Health and Department of Family Welfare nungeri teyari agüja liasü.

Camp nung shilem agiba doctor temi kiyong nung ki tonga oa tintet rogotem temang tendangba liasü.

Lakhimpur nung Delimitation anema nüburtemi nokdak

Dhemaji, Chiteni/July 8

(Agencies): North Assam, Lakhimpur district nung Subansiri, Borkhamukh, aser Bhimpura panchayats kübok aliba nüburtemi tawa sayaba delimitation draft anema metetdaksüogo aser ashiba agi, iba ajanga local tem mesungjemteti kümdaktsü.

Delimitation draft nung Subansiri aser Borkamukh gaon panchayat kübok yimtsung 15, koba 112-Dhakuakhana (ST) LAC küboki aiter item yimtsungtem ya 75-Nowboicha LAC nung dendaktsütsü benoka lir.

Ano Bhimpura aser Chauldhowa panchayats kübok yimtsung 10 koba tang kasa constituency nung lir item yimtsungtem ya 111-Lakhimpur LAC-i belener aotsü benoka lir.

112 Dhakuakhana LAC ya Scheduled Tribes (ST), atema mekazüka tokja lir aser 75-Nowboicha ya Scheduled Castes (SC) atema mekazükja lir, ibayongji Subansiri temeket nung aliba nüburtemi delimitation draft anema arudar.

Iba ajanga Subansiri nung aliba tribal tem shirnok dang Dhakuakhana nung yimden yimsüsüba tsütsü temeden aser maongkatem agia arudar saka Nowboicha nungbo parnok ket nungi item temeden aser maongka ya aginatoktsü ta tsübua bilemer.

Maneni Subansiri aser Nowboicha na indang indanga sendaktepba lenmang mali aser

Nowboicha ya Subansiri nungi km 100 pilar lir.

Kasaji menden mekazüka tokja aliba dak sendakba nung Bhimpura aser Chauldhowa panchayats kübok aliba nüburtemi tebilemetsü aliba lemsatepogo, aser 111-Lakhimpur nungbo parnok temeden aser maongka makai akümtsü ta bilemer kechiyong iba constituency nung parnok atema menden mekazükja mali.

Subansiri aser Chauldhowa temeket nung aliba nüburtemi, parnok tebilemdangba mangadangi parnok tashiyim agi tanga constituency tem nung bendenloktsüba atema sensak asemetsü atema senden aiben menogo.

112 Dhakuakhana (ST) LAC nungi 75-Nowboicha LAC-i parnok indang vote belener otsüba dak sendakba nung yimden yimsüsüba tsütsü tasa tamajung kar lir ta shia ketdangsurtem aitsüogo aser Subansiri nung aliba tintet rogotemi Dhakuakhana constituency nungi parnok masetshitsü aser delimitation draft anema nokdaktsü bangjemogo.

Kasa mapang nung Subansiri aser Chauldhowa nungi tintet rogotemi Lakhimpur DC ajanga Election Commission of India nem tezüluba nung takhangba ka agütsüogo. Parnoki taoba mapang ama Dhakuakhana constituency nungi parnok yimtsungtem manintsü takhangba agütsüogo.

Changtongya yimtak Multipurpose Community Centre ki lapok



Changtongya yimtak Wb. Limasunep Jamir (tachichilen nungi tenetbuba) IPS IGP (Range) Nagaland-i Multipurpose Community Centre ki lapoktsür kelen tangokba noksa.

Changtongya, Chiteni/July 8 (TYO): Tanu Changtongya yimtak Changtongya nung nungtak balala nung amshitsü asoshi asüba Multipurpose Community Centre ki Wb. Limasunep Jamir IPS IGP (Range) Nagaland-i tongti tesemdang ka ama lapoktsüogo.

Tanu iba ki lapoktsür kelen Wb. Limasunep Jamir-i mapang tatsüka agi jembidang yimtsung ka nung yimer nungtak asoshi ki tajung ka yangertetbaji yim asoshi temoatsü tulu lir, item ama mapa ya ajanga yimertem tenük lapoktsür, anungji tarutsü anogotem nunga yim asoshi nüburtemi mapa tajung yamai inyaksülata ashi.

Nüburtem tsungda nung kati ka dak temelung lemteta

litetsüla aser yimer asoshi bilema inyakra tangar den liromedema litetsüta Wb. Limasunep Jamir-isa sentong nung adenshia aliba yimertem ayongzüka jembiba. Paisa yimer tsungda nung longjema aliba den külemi ano pei yim kidanger yimtsung tem den putepa alitsü kanga dang nungtekerta shisem.

Sentong nung Mokokchung Superintendent of Police Manoj Kumar IPS, Changtongya Village Council Chairman Wb. Tiasunep Lkr, Deputy Director (Retd) Wb. T. Ali Longkumer parnokia shilem agia jembiba den iba ki meshiteta Changtongya Baptist Arogo Pastor Wb. R. Meren-i sarasadem iba den sentong

tenzüka Changtongya Town Baptist Arogo Pastor Rev. Temshi-i sarasadem aser sentong tatem nung Tsüngrem nem tenungsang aguja sarasadema tembang aser iba sentong Changtongya Senso Mungdang nung taoba Tir Wb. T. Meren Jamir ketdangsuba nung agi.

Iba Multipurpose Community Centre ki ya sen crore ka alangba aser iba mapatongya taoba Arkakong MLA & Advisor Wb. Imnatiba-i Tribal Affairs Department (Govt. of Nagaland) sentong kübok tenzüka yutsüba lir aser tanu iba sentong nung Tribal Affairs Department (Govt. of Nagaland) ajanga mapa inyaka tembangba technical report tejang aguja liasü.

Kohima police-i heroin apu

Dimapur, Chiteni/July 8

(TYO): Khuzama inter-state check gate nuka aliba Kohima Police-i 07/07/2023 nü garitem sota asadangba mapang Maruti Gypsy ka sot aser iba gari nung heroin gram 635, soap case 55 nung seper lia nguteta liasü. Temesepba mozü ya national market nung sen lakh 66.67 alang asütsü.

Iba dak sendakba nung ken o maneni bushisungdangtsü atema NDPS Act kübok Khuzama Police Station nung ken o ka benokogo.

Ukhrul, Manipur nung alir Zingshowung Muilung (43 yrs) aser Varenam Awungshi (36 yrs) na puogo. Tena den gari aser temesepba mozü dena sota yuogo.

Iba dak sendakba nung ken o maneni bushisungdangtsü atema NDPS Act kübok Khuzama Police Station nung ken o ka benokogo.



Mokokchung TB aser Covid hospital-i aiba lenmang kanga mejungi raksar nüburti senzü mesadamba ajanga Majakong Ward kübok medical kiyong nung alir temulunger kar lungjemer angati nubu den rongsen tenlateper lenmang yanglushitsüba mapang tangokba noksa nung angur. Iba gari lenmang ya küm talangka sorkari züzüa toktsür. Mokokchung, 8th July, 2023



July 08, 2023 nü Warangal nung lokti senden ka nung Ato kilonser, Narendra Modi-i teka ayiploksüba noksa nung angur. Kasa noksa nung Union Ministers- Nitin Gadkari aser G. Kishan Reddy nata angur.

Yimtsüngtem nung ajak nem tzü agütsüba mezüngbuba state ji HP lir

Shimla, July 08 (Agencies): Linük nung tenemlen aliba state tem rongnung yimtsüngtem nung kibong ajak nem tzü agütsüba mezüngbuba state ji Himachal Pradesh kümogo, ta Honibarnü Chief Minister, Sukhvinder Singh Sukhu-i sangdong ka ajanga metetdaksü.

Jal Jeevan Mission kübok atemzuka ayuba mapang matongdangi Himachal Pradesh-i iba alizüng tongtetogo, ta paisa metetdaksü.

Tenem-tekong aliba state nung timtem aika liaka state nung yimtsüngtem nung aliba kibong lakh 17.08 nem pipe ajanga tzü mesüoktsüogo, ta pai ashi.

2019 küm August 15 nü sangdongba Jal Jeevan Mission

nükjidong ya yimtsüngtem nung aliba kibong ajak nem pipe ajanga tzü mesüoktsüsa atema lir.

Mapang matongdangyongi tajemtzü tzü kibong ajak nem mesüoktsüba ajanga Himachal Pradesh-i ano alizüng ka tongtetogo, linük nung top 9 state tem rongnung Himachal Pradesh-a densemogo, ta chief minister-isa metetdaksü.

Jal Jeevan Mission kübok anogo shia pipe ajanga nisung ajak nem tzü temerük litre 55 agütsüsa atema lateta lir, ta kasa sangdong ajanga metetdaksü.

Tzü tajemtsü tajung agütsüba tsütsülen kanga junga inyaktetba ajanga state-i Centre nung sen talila-a nguogo, ta paisa metetdaksü.

Sukhu-i ashiba agi, state-

level scheme sanctioning committee-i scheme 1,742 agizükogo aser itemji sen crore 5757.79 jenjang lir.

Item scheme benoka inyaksü atema state nung tsüngsarusa aliba tesemtem jangjaba sülen talisa tribal nüburtem aliba tesemtem, aspirational districts aser adarsh gram panchayats nung tongtibangsüa rangloker inyak.

Item mapatong atema Panchayat nungi nisung 28,000, village water sanitation committee nungi züngsem 22,000 aser lanur den kaketshir 14,000 anioka inyak, ta pai ashi.

Tzü temerük agütsüsa atema state nung laboratory 69 amenok aser tzü tendangtsü atema yimtsüng shia nem Field test kits agütsüogo, ta paisa shisem.

Rajnath Singh-i Malaysia linük semdangtsü

New Delhi, July 08 (Agencies): Union Defence Minister, Rajnath Singh-i Hombar nungi tenzuka anogo ananü (July 10-11) Malaysia semdangtsü aser iba mapang nungji pai linük ana tsüngda defence tsütsü amalitep aser asalentong partnership tajungba akümtsü atema jembitsü.

Pai Malaysia defence minister, Dato' Seri Mohamad Hasan ajuruba den külemi Ato kilonser, YB Dato' Seri Anwar bin Ibrahim-a ajurutsü, ta Honibarnü defence ministry-i metetdaksü.

India nung yangluba Tejas tayimtsü alizüktsü jangraba linük ishika lir aser item linük rongnung Malaysia densema lir.

Tejas ya gol ka dang aketba aser raraba tayimtsü lir.

"Defence minister-i defence minister of Malaysia Dato' Seri Mohamad Hasan den senden amentsü aser iba mapang nungji minister anati linük ana tsüngda defence tsütsü amalitepa inyakba jenjang asadangba den külemi tesendaktep tashi itshitsü atema mapatong tasen

inyaksü asoshi jembitsü," ta Defence Ministry sangdong ajanga metetdaksü.

Linük anatisa regional aser alima tongti onüktem nung o lemteptsü.

"India aser Malaysia napronglai region nung yimjung aser azükaru alitsü tejangraba yur inyaker. Democracy linük ana tsüngda lenla aika nung tesendaktep aliba tangbo asalentong partnership-a yangluogo, item lenlatem rongnung defence aser security densema lir," ta kasa sangdong ajanga metetdaksü.

OFFICE OF THE
CHUMOUKEDIMA YAONGYIMSEN TETSÜR TELONGJEM
CHUMOUKEDIMA : NAGALAND

TENÜNGSANG AGÜTSÜR

Wt. P. Temjennungla Imsong
D/o. Lt. I Panger Imsong aser wt. Alikangla na jala-i NPSC CESE tatidang nung Post Graduate Teacher (PGT) Education (Under School Education) nung takok tulu ngüteba asoshi pelaba metedaksür.
Teyanglur Tsüngremi maneni la wadang moajangma.

Sd/-
Wt. Samalemsü
President CYTT

Sd/-
Wt. Moala
General Secretary, CYTT

KONANG TETUSHI AGÜTSÜR

Dr. Walosangla (Wb. Aowati Jamir aser Wt.M. Chubala Aier na jala) NPSC tatidang 2023 nung PGT (Economics) jenjang ajangzükba atema Jaongchir kidong ajanga tenüngsang tulu agütsür.
Tarutsü nung Tsüngremi ne wadang maneni azükarua moajangma.

Sd/-
R. Ali Jamir
President
Jaongchir Kidong
Mongsenyimti

Sd/-
N. Angum Jamir
General Secretary
Jaongchir Kidong
Mongsenyimti



July 08, 2023 nü West Bengal Panchayat election agiba anogo nung Howrah district nung aliba polling station ka nung police-i voters ID reprangba noksa nung angur.

PM Modi-i Rajasthan nung sen cr. 24,300 indang project semzüktsü

Jaipur, July 08 (Agencies): Corporation (ESIC) hospital Honibarnü Rajasthan kübok Bikaner nung Ato kilonser, Narendra Modi-i sen crore 24,300 indang terenlok project kar semzüktsü aser project tasen kar atema foundation lung azüngtsüogo.

Ato kilonser, Modi-i Inter-State Transmission Line for Green Energy Corridor kübok six-lane greenfield expressway section Iba sentong nungji Union (Amritsar-Jamnagar Economic Corridor) semzüktsü, Bikaner nungi aser Union Minister of State Bhiwadi transmission line ka aser yipten 30 aliba Arjun Ram Meghwal nata Employees' State Insurance

ka semzüktsü. Paise Bikaner railway station yanglushitsü aser Churu-Ratangarh section nung gari lenmang kilometer 46 yanglutsü atema project tasen tenzüktsü.

Norangdesar, Bikaner nungi Ato kilonseri remote button ajanga item projects semzüktsü. Iba sentong nungji Union Minister for Road Transport & Highways Nitin Gadkari aser Union Minister of State for Law & Parliament Affairs, Arjun Ram Meghwal nata densema liasü.



July 08, 2023 : New Delhi nung tanü ajongbena tzünglu tuluka aruba sülen lenmang nung tzü mopanga aliba tesem nung garitem meyilongi dang senzüba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, CHITENI (JULY) 09, 2023

Kibuba dang pelasete alitsü

Asenok Khristan-tem rongnung tesayuba tai sayuba aser tangatetba tai nung amangba kaji, Yisu sülen anidakertembo kodanga timtem aser takoksa majurutsü ta bilemdaktsüba ya lir. Ibayongji, asenoki anema aser junga aliba mapang dang Yisu Khristaji Tsüngrem chir Kibur Khrista ta amanger saka timtem toudhi aser sensak tia aruba mapangbo tanga tsüngrem bushia aoer. Iba lima nung ali tashi nisung ajak asoshi timtem toudhi aser shisabolu lir, itemji paidoktsü makoker. Khristan akümyonga shirangtsü, tamakok angutsü aser timtem ajurutsü. Ajisüaka, Khristan akümba tajangzük aser tamaittsü kaji shirangyonga, tamakok anguyonga aser timtem toudhi ajuruyonga itemji akoktsüsa tashi aser tangatetba agütsütsü. Item tashi, tangatetba aser teimla ajakji amangba ajanga arutsü. Iba amaji, asenok taküm aser kibong nunga mapang kar nungbo mapa ajak nung tamakok angur ama asütsü. Aji oda, kodanga shia marutsüsa tesama aser takoksa tia ajurutsüa akok. Ajisüaka, iba mapangji asenok taküm aser tamang jenjang indang bilemdangtsübaji kanga tongtibang lir. Habakkuk ainker mapang Babylone nungier alienba mapang, Tsüngremi pa dang Babylone nungier ket nung Yihuda nungertem takoksa aser tesama tulu ajurutsüba indang sayua liasü. Itemji ngur pa tetsüng aser tebangmechi ajak atendena shisabolua liasü. Kodang tsükchirtemi Tsüngremi shimtetba Yihuda kin makdir, idangjiibo Yirusalem yimti tanük kuma ajasatsü, idangji tsükmenatsü, mongozünu aser oliv jang atangtsüsa alu meyimettsü, kechiyong Babylone nungertem item ajakji raksatsütsü. Iba Laishiba ya azüngdang, küm 60 jakdang asen lima nunga India sepaitem yim ana asem yim ka nung sepbanga yur yimtem rongdoktsüba aser alu raksatsüba tensa tia tamajung asenok tsüraburtemi ajuruba mesüka lir ta temulung shia bilemtetter. Item tensa tiatemji tetsübuttsüka lir. Iba ama tetsübu aser sensak tia nung asenok aikati timtem marem tsükchirtem den jungteptsü merangtsü aser parnok tsüngrem külemtsü. Atangji, tanüa asen tendaka asenok timtem marem mesüra takar kümnü marem mesüra takok ngunü marem asen Tsüngrem, shibai asenok samar alitsüba tia nungi kümzük, iba Tsüngrem taohiji amadoker tangar tsüngrem külemtsü tenzük. Ajisüaka, iba ama tetsübuttsü aser shisabolutsüsa timtem toudhi aser takoksa ajuruaka, Habakkuk-ibo Tsüngrem dak dang pelaa alitsü ta pai Tsüngrem dang shitet. Atangji, iba ama tensa tia ka nung, Habakkuk-i chiyongtsü züsentettsüsa alu meyimettsü aser yimitemji pa ket agi kümzüka meyutettsü, ajisüaka pai inyaktettsüba mapa ka liasü, ibaji Pai Tsüngrem den tepela nung alitsü shimtetba tamang aser tangatetbaji liasü. Iba ama timtem aser takoksa ajuruba tia nung, Habakkuk-i taoba mapang Tsüngremi Israel nungertem Egypt alar tia nungi temerem tzü sadanga anitetba taochi bilemtet. Kasa Tsüngremi Israel nungier nem takok agütsütsü atema Yihusua mapang anü aser ita melui atadaktsüba sayatenya aser taochi mapatem bilemtet. Item mapatem mamai timtem mapang nunga Tsüngrem tenüng asangtsü bilemtetba nisungji Habakkuk liasü. Aiben asenoki Tsüngremi asenok dang meimba, aochiba aser aneptsüba mapa aser mapangtem amadoker. Aji oda, asenoki Tsüngrem dak amangbaji alima timtem toudhi ajak nungi jenbua ayongayonga alitsü amai amanger. Ajisüaka, iba tamangji shitak masü. Tsüngrem dak amangba tamang jagibo timtem toudhi aser tepela mapang ajak nung Tsüngrem temeim mamadoki Tsüngrem tenüng sanga dang liteter. Kodang asenoki iba tamang jenjangji tongdir, asenok akaba ajak samayonga aser asen dak timtem tulu agi atongyonga asenoki Tsüngrem nem tenüngsang agütsütettsü. Habakkuk ama, kodangsa asenok takoksa aser timtem tiai idir, taoba mapangtem nung asenok dak Tsüngremi tajung inyakbatem bilemtetdi. Tsüngrem tenüng asangtsüba ya asenok takok anguba mapang nung dang masü mesüra peria kaa aitba mapang nung dang masü saka mapang ajak nung Tsüngrem tenüng asangtsüla ta 1 Thessalonika 5 nung shia angutsü.

OLEMSABANG TSÜNGREMI NAGA NUNGER KHRISTANTEM TANG ASÜNGDANGER

~ L.Kika Pongener.

(Yashi adok nungi...)

Ne adianu kong lir ? "Kibubai Kain dang asüngdang, Nenu Abel kong lir ? Kain-i langzü ni memetet, ni künu anukba asü ? Kibuba Tsüngremi ashi, Nai kechi inyak ? Nenu Abel zü ola agi kodak tonga atur kü dang ayimdendagi" (Lipok-4:9-10). Tanü asen Naga lima nung nisung tepsetba, nisung kahsetba, nisung puer aoba, tepsettsü amokmerenba, tetsür taküm tashiyim agi raksatsüba, rakzükraaktemba, temelen saru saruba, ashi aueyaba, itumla mesukba tatalokbatem anogo shia osang kakat-tem nung azünger. Asen Naga nungier kin o kin tsüngda nung, adianu o adianu tsüngda nung, yimer o yimer na tsüngda nung, kati ka den sempatepa tsükchiteper, tenukmeremteper, ali aser lika-liyim raktepba, yimtsüng o yimtsüng na tsüngda raraba, kin kidong lipoklisang bushitepba, tama-tesu otsü tapu tapu bushitepa zülutepba, kin o kin/kidong o kidong tsüngda tambu/tama raktepa court nung case agitepba, yimbo-yimli raktepba, itumla mesukba temenen agi asen Naga lima sungadokogo. Lokti tentet ajak nung tanishir menden raktep dang kati ka mezüngshir, kati ka aküm metsübur, tenukmerem mekokachi agi kati ka ajemoka toktsür. Abel-i tedi Kain anema kecha aibelen meinyak sernung Tsüngremi Abel kanga moatsüba mereprangnu-i tenukmerem mekok-achi agi tepsetba ama, tanü asen putu nunga pei adianu tsüngda nung aser pei nubur tsüngda nung kati ka ajungba mereprangnui tenukmerema arishitepba agi sunga kümogo. Aji oda, asen Naga lima nunga Kain-i tenu Abel anema apusoba ama, kati ka den tsükchitepa, sempatepa, arishitepba agi asen alima nung yimjung tesunep mali petsaperong, mepetmesu, melang-mepu, mangatettep aser rongrongshishi aser telemsatep agi sunga lir. Tanü asen Naga nungier ajak dang Kibuba Tsüngremi "Ne adianu kong lir" ? Ne adianu den yimjung nung nung lir ma ? Nenok rongnung yimjung lir mali ?... ta asüngdang.

Ne tenung shiba ? Esak-er chir Yakob-i tebu nungi tedi Esau meyong tambu senmang miima rakzüktsü mechi, tekülak agi tedi Esau mesuka yanglur oa tebu ashioktsü. Aser tebu pa dang... "Na shiba kü chir" ta pa tenung asüngdang; Yakob-i pa Esau-a ta langzü. Yamaji Yakobi tebu ashioktsür jena orr küm aika sülen teko Laban'er kidang nungi meyipa arudang len tom nung arem ka nung mejanga alidang, aonung ayaterm nungi anep dang sangwa mapang tashi pa Kodak Tenyar ka den melangtep, aser Tenyar jagi joko sangwa-dokogo ni chiokang ta Yakob dang mepeshi, saka Yakob-i nai ni memoatsü tashi ni na mechioktsü ta langzü. Idangji Tenyar jagi surabangla ni na moatsüdi,... "Ne tenung shiba"...ta asüngdang. Aser Yakob-i langzü, "Kü tenung Yakob". Yakob-i tebu Isak dangbo pa tenung Esau-a ta langzü, saka Tenyar dangbo shidakba pa tenung "Yakob"... ta langzü. Yakob-i mezüngbo pa tenung tai shir tebu ashioktsü, anungji iba aibelenba mechi pa tetsübu tatenden agi sunger jenshia senzür taküm ka aküm, aser koloni odir ajaklen pa-a ashioktsütsüsa tensa tia ajuru. Teko Laban-i par jala tanütsüla Rachel shiba topur tajung liasü la atema küm tenet tashi tenzükdaksür külen, pa nem Lea-la ang kinungtsü asütsü agütsü aser, ano küm tenet talila Rachel atema tenzükdaksü. Ano san aser nabong atema atemzükba nunga teko Laban-i Yakob atemzükba ama masü aiben dang ashioktsü. Ajioda, pai koda tebu aser tedi Esau na ashioktsü, iba küsa tia pai-a ajuru. Saka kodang Yakob-i Tenyar dang pa tenung shidakba ashi, idangjiang pa nem tenung tasen ka "Israel" ta melentsü koba tetezü pai Tsüngrem aser nisung den toktep aser akok (Lipok-32:28). Tanü asen lima sorkar, yimden, arogo aser loktiliba ajunga ochimashi mapatem agi shirangba ya tanga kecha agia masü, Yakob-i tedi Esau senmang tekülak agi rakzüktsü atema pa tenung teyazü shir tebu ashioktsüba ama, tanü asen nuburtem ajungai ochi mashi rongsen penbuteper, rongsen yong ochiba yoka achir, rongsen aser supokrem agi tenuk pokadoker, marentaki ochimashi mapa inyakttsü temulong ulur aser aakseta mebilemer. Ajioda, nuburtem kinuk ajungalen ochiba aginua ola adoka asateper, saka ochi pukümer shinga mali, ochiba yimdong nung temesor shinga mali lao-a lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Kibuba sarasadem agidaktsüba atema lokti kati principal dak azük



July 04, 2023 nü Pune yimti tezülen Ambi yim dak tsüraburtem den Vishva Hindu Parishad aser Bajrang Dal züngsemtemi D. Y. Patil High School nung principal aser Khristan, Alexander Reid arishia azükdang tangokba noksa nung angur.

July 08, 2023: Maharashtra state nung nija school ka nung azünger kaketshirtem nem Khristan sarasadem agidaktsür, ta tai tonglokja lokti kati principal dak azük.

July 04, 2023 nü Pune yimti tezülen Ambi yim dak tsüraburtem den Vishva Hindu Parishad aser Bajrang Dal züngsemtemi D. Y. Patil High School nung principal aser Khristan, Alexander Reid dak azük aser July 5 nü iba video ji social media nung prokshia liasü.

Lokti jagi "Har Har Mahadev" ta ayimdena principal dak azük.

July 7 nü osangbener den jembidang Talegaon Dabhade nung police inspector, Ranjit Sawant-i, iba tatalokba atema school mesüra principal-i ken o mebenok, ta metetdaktsü.

Osangbener den jembidang Sawant-i, "Tsürabur kari ang principal anema ken o agütsüogo, ajsüaka onoki (police) tang tashi nung shinga anema ken o mebenok," ta metetdaktsü.

Paisa, "Onoki iba t a t a l o k b a bushisüngdangar aser onoki principal dak azükertem nem temerenshi agütsütsü,"

ta metetdaktsü. Police ketdangseribo, "Khristan sarasadem, ta asübaji kecha balaka masü, kechiyong sarasadem nungji "Oh Kibuba' ta dang lir. Kaketshirtem indang school diary nunga ibaji zülua lir, ajsüaka ibaji Khristantem indang Tsüngrem dang masü," ta ashi.

Tsüraburtemi, ibaji Laishiba nungi agizükba lir ta ashir, ajsüaka sarasadem nungji Laishiba nungi agizükba kecha mali, ta pai ashi.

Iba school nungji class 12 tashi lir aser kaketshir ajak senteper 1,341 lir.

Anti-conversion ozüng agientsü telemtetba pelaa agizüker: Peter Machado

July 08, 2023: Karnataka state sorkari anti conversion ozüng agientsü telemtetba agibaji Khristantemi pelaa agizüker, ta Bangalore nung tongti putir, Peter Machado-i metetdaktsü.

"Anti-conversion ozüng ya taoba sorkari benoka liasü. Iba ozüng nung tashishitsü lir, linük temzüng alema lir aser menüngdakba ozüng lir," ta pai ashi.

Paisa, state assembly nung o lemtepdang kecha mashishitepi iba ozüng agientsü imlar, ta ashi.

"Khristantemi mapang ajak nung India linük temzüng kübok inyaktsü. State aser linük atema inyaktsü aser kin mesüra yimsü kecha mebendangi onoki nisung ajak tenzüktsü, talisa sensakertem aser meshimejungertem tenzüktsü," ta pai metetdaktsü.

"Karnataka aser tanga state tem nung anti-

conversion bill agizükba sülen Khristantem anema inyakba kanga bulua kümogo, kechiyong ibaji ajanga Khristantem anema inyaktsü atema nisung tamajungertem ajungshir. Iba ozüng agizükba sülen tamangba yimsü balala tsüngda melung melemtep tenzükdaktsüogo," ta pai sangdong ka ajanga metetdaktsü.

Peter Machado-isa tanga state temia kasa telemtetba agia iba ozüng tesashi agientsü imlar, ta ashi.

Taoba ita Karnataka nung Congress sorkari taoba mapang BJP sorkari benokba anti-conversion ozüng agientsü atema telemtetba agia liasü. State assembly senden nung anti-conversion ozüng agientsü atema sorkari bill ka benoktsü; state legislative assembly July 3 nungi tenzükogo.

Osangbenertem den jembidang state Law & Parliamentary Affairs

Minister, H K Patil-i, "Cabinet senden nung anti-conversion bill atema o lemtepdang. 2022 küm parnoki (BJP sorkar) benokba ozüngtem melenshitsü atema onoki bill ka renemogo. July 3 nungi senden tenzük dang onoki iba bill ji benoktsü," ta metetdakja liasü.

Karnataka nung benokba Anti-conversion Bill dang Karnataka Protection of Right to Freedom of Religion Bill, 2021 ajar, aser iba ozüng ya 2021 küm December ita nung Karnataka Legislative Assembly nung agizüka liasü.

Tashiyim amshia mesüra mesüzüka tamangba yimsü meyipdaktsüba nokdangtsü nükjidong nung taoba sorkari iba ozüng benoka liasü.

Iba ozüng kübok aibelenertem küm 3 nungi küm 10 tashi tepuokdak ayutsü aser senchi 50,000 tashi achitsü.

ANOGO ABEN TSÜNGREM DEN

NI YANGI ALITSÜLA

"Kechiaser Tsüngrem dangi asenok bener otettsü ... Khristaia temenentem asoshi khen timtem angu: Pa shi nung südaktsü saka tanela mung taküm kümdaktsü" ~ 1 Peter 3:18

Yisu taküm aser mapa indang kodanga mangashidangba yim tezü ka nung missionary ka oa sayu. Tejaklenji iba yim aser kin nung tokolak lenir jagi kanga tenoka anga-a amen.

Kodang Yisu Khrista kangki nung asüba indang angashi pa sasa sota meytutet, pongmesoa noktaker ashi "anenang, Pa kangki nungi anizükang, ni yangji alitsüla, Pa masü." Osang tajung tetezüji pai angatet, pa temenen pur saka Yisu Khristai temenen mali.

Tsüngrem chir kangki nung asüba indang, Pa timtem, tekangshi, kangki nung azü tokshiba, tatala, maaaksü ajakji shisadangang aser ne mulung ajak agi ni yangji alitsüla ta shiteter asü? Tejakleni mera ka oa Pa dak amangang, Paul den nai ya ashitsü "Khrista den ni kangki nung angenlokogo, aser ni ano taküm mali, saka kü dak Khrista taküm alir" (Gal. 2:20).

Khrista asen melen asü, asen menen Pai aben, Tebu Tsüngrem den telungjem agitsü lenmang lapoktsü. Iba Khrista den mapa ajak nung ka küma alir asü? Nai ni yangji alitsüla ta shitettsü asü?

SARASADEM:

Kibuba Yisu, Nai Kangki nung kü menen abenba asoshi ne tenüng asanger: Amen.

Myanmar kübok Kachin state nungi Khristan aika jenshiogo

July 08, 2023: Myanmar kübok Kachin state nung sepaitem aser sepai yimsüsüba anema nokdaker Kachin telok tsüngda raraba sülen Baptist Khristantem densema Khristan meyrjang ka dak tema jenshiogo.

Nan San Yang yim dak nungi Khristan kibong 160 shi jenshiogo; iba yim ya Laiza jila nungi kilometer 20 shi dang pilar lir. Iba jila nung Kachin Independence Army (KIA) headquarters lir.

July 3 nungi tenzüka Kachin telok aser sepaitem tsüngda raradang yimtsüng toktsür jena aoertemji Wai Mai jila nung aliba Catholic Tenla ki moapu nung jenoka lir.

Nan San Yang yim dak nungi jena aoer, Gam Aung-i, ano maneni July 6 nungi asentenshir rarateper, anungji ano aika jenshitsüa akok, ta metetdaktsü.

"Onoki kidang kiset shiruru toktsür süoshi tera dang bener jena aru. Hopta ka-ana lirbo kidangi meyipa otettsü onoki imlar," ta pai osangbener dang ashi.

Tang Tenla kidang jenoka alirtemji Arogo tentetem aser ketdangsertemi kobika chiyungtsü agüja mesütsüar memetetba ajanga parnok shisabulur.

"Onoki chiyungtsü, mozü aser tanurtem atema school nüngdaktsü," ta Aung-i ashi.

Nam San Yang yim dak Arogo nung putir, Vincent Shan Lum-i, pa-a July 3 nü yim daklirtem den külemi ajen aser tensa mesüngjem tashi parnok Tenla kima moapu nungji alitsü, ta ashi.

Shan Lum bo Myitkyina nung aliba putirtem kidang jenoka lir.

Myanmar linük nüchiso anguba mapang nungi Khristan nütsüng teimba aliba Kachin state nung KIA-i nüchiso meshiba ajanga mapang shia rara adoker, ajsüaka Myanmar sepaitem yimsüsüba tenzükba mapang nungi tesashiba rarar.

July 4 nü KIA-i nüburtem dang kanga yakyaka alitsüla, kechiyong sepaitem tali arusemba ajanga ano tensa tamajungba akümtsüa akok, ta metetdakja liasü.

"Sepaitem mainshira ano tesashiba raratsüa akok. Anungji mapang talangka atema chiyungtsü rizünga alitsüla, ta KIA otongdar, Colonel Naw Bu-i metetdakja liasü.

2011 küm nungi tenzüka tang tashi nung nisung 101,500 shi Kachin state kübok refugee camp balala nung jenoka lir; iba nungji 2021 küm sepaitemi democracy sorkar atsüngdokba sülen rara ajanga jenshir 27,000 densema lir.

Kachin state nung nütsüng million 1.7 lir aser nütsüng teimbaka Khristantem lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Renemkonem

(adv) tiptema ayu, jungjunga renem (get ready, keep things orderly)

* Onok aeni aodang teti jelia **renemkonema** ayur.

Renemrenemer

(n) tajitetsü maket, tajinütsüka renemer aliba (tidy)

* Anungbabo teti **renemrenemer** dang alir.

OLONG PAITEP # 6570

Grid for crossword puzzle #6570 with numbered squares 1-15.

TIPIEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen latetsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 6569 TELANGZÜBA

TIPIEN :

- 1. Ayaterm, 7. Anünü, 8. Aiben,
10. Kiralongrar, 13. Nükla,
16. Arong, 17. Süngpak.

LANGTSÜNGLEN :

- 2. Yangji, 3. Tinu, 4. Mapa,
5. Tembar, 6. Shiner, 9. Hon,
10. Kangki, 11. Rakzük,
12. Ajunga, 14. Anis, 15. Trog.



**KIDANGSER ALOKBA O SOBANGBA NATI
POLICE ASHIOKTSÜR**

Alokba : (Phone nung) Hello, ya police station südi, ni Alokbai jembir ako, ozü kidangser Sobangbar kidang heroine aika tatsüktsü süng nanga alidak kanga junga mima lirkoti, nenoki khen bushidangangma, saka ni ashi ta teshima no.

Police : Ok, kanga pelar. (Police aruagi Sobangbar süngnang ajak to pu agi sosaa bushiaka mangu, tezütangseter oadok)

Alokba : Temba, parnokto aruagi süng ajak somatsür südi?

Sobangba : Aitoya, nü idea sa tajungba, ana jembir amato nür atsü nung hon crore jenjang tupanga lir ta shidi no?

Alokba : Ok ok! Ni metsü remner asüngto!
~ Lilir : WhatsApp

Golaghat nung temesepba mozü shibelenertemi police amak



Guwahati, Chiteni/July 8 (TYO): Golaghat, Assam kübok Raidangia tesem nung temesepba mozü shibelenertemi police ketdangsür ka maka yirutsü.

Osang ajanga ashiba agi, police ketdangsür ya Hokolbar aonung tesem kar meita aoba mapang temesepba mozü shibelenertem asütsü ta temulung melemi bilemertemi yirutsü.

Police ketdangsür Chayanika Borkotoky lenisüba nung police team kati Ganja shibelenba nung nung densema alirtem kar pua liasü.

Osang tejangja angazükba sülen parnoki Pratap Saikia'er ki meita ao.

Ajisüaka, police team inyakyim anema Saikia aser pa kinungtsü nati nokdakba sülen tensa mejungi aküm.

O langtepba sülen teka sangshitep tenzük kechiyong Saikia aser pa kinungtsü nati police tem maka liasü. Iba mapang Borkotoky tesem aika nung yirua liasü.

Yirur alisang ya Kamarbandha police outpost In-Charge lir.

Police amakertem yagi, süng, bu aser tanga hadirtem amshia liasü.

Ajisüaka iba tatalokba sülen police temi Pratap Saikia aser Upen Saiki na Ganja shibelenba nung shilem agiba atema pua liasü.

Tena anema Indian Penal Code (IPC) section tapet kübok ken o benokogo aser police temi ken o bushisüngdangdar.

Meghalaya: KSU-i Khliehriat nung railway line anema nokdak

Shillong, Chiteni/July 8 (Agencies): Khasi Students' Union East Jaintia Hills District unit-i, Khliehriat nung railway line ka amenoktsü atema sorkari sentong yangluba anema nokdakogo aser ashiba agi, iba ajanga state-i bendangertem tali senoka aittsü.

Union-i ashiba agi, bendangertem aika senoka aitaka state nung lisopurtem temeden ano kanga junga kümzüka mali.

Chief Minister Conrad Sangma-i ashiba agi, East Jaintia Hills headquarters, Khliehriat leni aoba railway line ka yanglutsü atema asadangogo.

Ajisüaka Khasi Students'

OFFICE OF THE DIMAPUR WAROMUNG OZÜKUM TELONGJEM

TENÜNGSANG AGÜTSÜR



Wb. N Imsümeren Ozükum aser Wt. Alemla Imsong tena jala Kr. Sashirenla Ozükum NPSC CESE 2022 tatidang nung Post Graduate Teacher (Sociology) 1st Rank jenjang nguteta konang bener arutsüba asoshi Dimapur Waromung Ozükum Telongjem ajanga tenüngsang tulu agütsür.

Tsüngremi jala tarutsü wadang ajak nung maneni maojangma

Sd/-
President
Chubakumba Ozükum
DWOT

Sd/-
Secretary
T. Senti Ozükum
DWOT

OFFICE OF THE MERANGKONG LONGKUMER KIDONG (NOKDANG, CHANGKI) TULI UNIT

TENÜNGSANG AGÜTSÜR

Tuli nung aliba Longkumer Kidong (Nokdang, Changki) ajanga Kr. Maongnaro Lkr D/o Rev. C. Tongpang Pastor Tuli Lenden Baptist Arogo aser Wt. I. Moala Kichu na jala-i N.U. ajanga agiba Under Graduate of Arts tatitang 2023, History (Honours) nung Gold Medal nguteta Sensosanger aser Talisa Tebo ana semchirtem nüm konang nungsang tulu bentsür arutsü nung kanga pelar aser Tenüngsang tulu agütsür.



Maneni tarutsü anogotem nunga jala taküm lemantem ajak nung takok aser temoatsü nung aniang ta sarasadema atar.

Sd/-
Tongpangtizük
President MLKT

Sd/-
S. Yangermongba
Secretary MLKT

OFFICE OF THE TRAILBLAZER SOCIETY Dimapur- 797112, Nagaland



Changki nunger Wb. Sentiningsang Longkumer Executive Committee Member, Basketball Federation of India inyaksü shimba atema tenüngsang tulu agütsür.

Nai mapa tajung inyaktetbatem aser jenjang tajung tongtetba atema onok kanga numa atanger. Nai meranga inyakba, alizüng atongtsü merangba aser akangakanga noktakba ajanga "Basketball Federation of India" office nung Nagaland nungi mezüngbuba nisung kümogo.

Nü tarutsü wadang nung maneni takok ngudakjang ta moatsür.

Dr. Temjennungsang
Chairman Trailblazer Society

Rejosanen
Secretary Trailblazer Society

Union-i tawa district indang Deputy Commissioner den ajurutepe parnok tebilemba lemsatepogo.

Kidanger state aser Bangladesh densema kidanger linüktem nungi bendangertem senoka aitba nokdangtsü atema temzüng ozüng tesashi ka meyanglu tashi parnoki iba project ya magizüktsü ta shia tezüluba nung takhangba ka agütsüogo.

Union-isa, railway terenlok asoshi aritepa inyaksangshi masütsü tekümdangtsü metetdaksüogo.

Iba melena parnoki ketdangsürtem dang lenmang tajung yanglutsü, healthcare aser

education jenjang aser tanga tenüngdakba service tem ajungkettsütsü mepeshia liasü.

Temetetsükaji Khasi Students' Union-i taoba mapanga Tetelia nungi Byrnihat tashi railway project anema liasü, koba 2016 küm sotogo.

Parnokisa local lenirtem aser nüburtem tenüng nung nokdakertem dang parnok den longjemer iba railway project anema nokdaksü ayongzükogo.

Jaintia Hills Autonomous District Council (JHADC)-i parnok indang opposition den longjemer inyaksü ta timla nung parnoki shiti ka agütsüogo.

Iran nung ano nisung ana yimjak nung tepset

Tehran, Chiteni/July 8 (Agencies): Taoba kum southern Shiraz nung shrine ka amakba dak sendakba nung Iran-i yimjak nung nisung ana tepsetogo. Iba tesem amakba ya ISIL (ISIS)-i parnoki amak ta nangzükogo.

Honibar anepdang aletseta sudaktsüba nisung ana ya Mohammed Ramez Rashidi aser Naem Hashem Qatali ta jangjaogo. Suprem court-i tena tepsettsü atema obendang agütsüba sülen tepseta liasü, ta judiciary indang official news outlet ajanga metetdakja liasü.

Fars province nung Shah Cheragh Shrine ya Shia Islam atma tongtibangtiba shrine rongnung ka lir aser iba tesem ya 2022 kum October 26 nü maka liasü.

Iba mapang nung security camera nungi clip sayuba nung nisung ka prangbone bener shrine telungi aiba nguogo. Shrine telung nung injang khaloktsüba sülen pa kimai tugu aser pai temeshi ainer aoter telok ka aser staff tem dak injang khalokja liasü.

Mezüngbuba ketdangsurtemi iba lendong nung nisung 15 asü ta metetdaksü, ajisüaka mapang tatsüka lir nisung 13 asü aser nisung 40 yirua liasü ta metetdaksüshi. Iba shrine telungi ia injang khaloktsüsang ya Tajikistan nungi lir aser pa security

force temi khaseta liasü.

Iba tatalokba sülen ISIL-i parnok indang Amaq News Agency ajanga parnoki iba tesem amakba indang nangzüka liasü. Iba telok yagisa 2017 kum Iran indang parliament amak aser Tehran nung taoba Supreme Leader Ayatollah Ruhollah Khomeini indang mausoleum maka liasü.

Ken o dak sendakba nung Iran nung ketdangsurtemi shrine amaksang nem teyari balala agütsüba atema nisung aika pua liasü.

Osang ajanga ashiba agi, Honibarnü tepsetba nisung ana ya kidanger Afghanistan nungi ISIL operatives tem den tongtepratepa liasü aser shrine amaksang nem prangbong agütsü aser pa iba shrine-i anir oa liasü.

Iba tesem amakba dak sendakba nung ano tangra nisung asem obendang aser tepuokdak ayutsü atema temerenshi agüja liasü.

Tepuokdaki yokertem rongnung Mohammad Rahmani densema lir. Pa ya Tehran nung ISIL operative tongti rongnung ka lir aser pa kum 25 tepuokdak ayutsü asoshi obendanga agütsüogo. Pa den ano iba telok nem teyari agütsüba atema Mostafa Jan Amani kum 15 tepuokdaki yok aser Hamidollah Kaboli kum pongu atema

tepuokdaki yokogo, ta judiciary-isa metetdaksü.

2022 kum September ita arishi kum 22 tain Mahsa Amini police ket nung aliba mapang asüba ajanga Iran ajunga nung longkak aita mepetmesü tulu adoker aliba mapang iba shrine maka liasü.

Amini asüba sülen anogo 40 lir northwestern Iran nung la aliba jila nung la den asüpa sentong agütsü asoshi nisung meyrejang aika adenshiba sülen iba mepetmesü tenzuka liasü.

Iba mepetmesü adokba ya Iran-i bendangertem dak tai tongloksü, shirnoki linük security tashi meiti kumdaksü aser Shiraz amaktsü atema lenmang lapokja liasü, ta ashi.

Kasa mapang nung takum Iran nung nisung aika tepsetba dak sendakba nung United Nations-i süoki ia bilemba lemsatepogo aser tang amai dang nisung tepsetyonga ora taoba kum nisung 582 tepsetba dang nungi timba akümsü ta bilemer.

2015 kum nisung 972 tasüba agi merenshia liasü, koba tang tashi nung kum ka nung nisung timba tasüba agi merenshiba lir.

Nisungtem ya timba temesepba mozü shibelenba atema tepseter. Sorkar anema longkak aita dak sendakba ken o tem nung aija nisung tenet tashi tepsetogo.

NATO züngsem akümsü Ukraine langa lir: Erdogan

Ankara, Chiteni/July 8 (Agencies): NATO nung adentsü atema Ukraine tejangraba aliba Turkey-ia pusemer, ta Turkey tir Recep Tayyip Erdogan-i Ukraine tir Volodymyr Zelenskyy dang ashi. Ajisüaka pai Russia-i Ukraine amak tenzükur anogo 500 tashi raratepba aliba ya yimjung nung tembangtsü atema inyaktepsü asoshi mepeshia liasü.

"NATO nung züngsem akümsü atema Ukraine langa lir," ta Erdogan-i Honibarnü Istanbul nung Ukraine tir den külemi osangbenertem den sensaksemba mapang ashi. Paisa, linük ana ya yimjung asoshi sensaksemshitsü nüngdaker ta ashi.

"Ajak den apet yimjung benokba ajanga tamakoker shinga madokdaksür," ta Turkey lenir-i ashiba Reuters news agency sangdong ka ajanga metetdaksü.

Pai Ukraine pusemba atema Zelenskyy-i Erdogan dang kanga pelaba lemsatep, koba Mongolbarnü nungi tenzuka Vilnius, Lithuania nung tongtibang NATO summit ka amentsü lia atalokogo.

"Ukraine indang territorial integrity aser sovereignty pusemba atema ni kanga pelar. Peace formula. Asen linüktem, nüburttem aser tejangrabatem kumzuka ayutsüba," ta Ukraine lenir yagi Erdogan den sensaksemba dak sendakba nung tweet asü.

Ukraine nung lenir yagi par linük iba Western military alliance nung adentsü atema jaoktsü asoshi mepeshia arudar, aser ashiba agi, Russia-i tesem balala amakba nokdangtsü asoshi Ukraine ya Europe nung tatembangbuba defence line kumogo ta ashi.

NATO July 11 aser 12 nü senden mamen tsüngda Ukraine NATO nung dendaktsütsü atema teyari meshitsü asoshi Zelenskyy-i iba hopta Czech Republic, Slovakia aser Bulgaria semdangogo.

Prague nung rara tembangli Ukraine NATO nung adentsü atema pusemstü ta tenangzükba nguogo aser Sofia nung tensai kodang meladir idangji parnok NATO nung züngoksemstü atema teyari agütsütsü ta tenangzükba nguogo.

NATO Secretary General Jens Stoltenberg-ia, Ukraine ya NATO nung züngsem ka akümsü ta nenshia metetdaksüogo.

Ajisüaka Ukraine iba telok nung kodang adentsü iba indang tang tashi mejangjai lir.

Hokolbarnü United States-i Ukraine timla temseptsüogo aser ashiba agi, iba hopta agütsü aliba summit nung Ukraine NATO nung adentsü atema mejaoktsü.

US National Security Adviser Jake Sullivan-i ashiba agi, Vilnius nung agütsü aliba summit ya züngsem akümsü atema lenmang lapoktsü asoshi tongtibang asütsü, ajisüaka NATO züngsem akümsü atema Ukraine-i ano jenjang kar agütsü nüngdaker.

Ukraine iba telok nung kodang aser koma zügsem ka akümsü iba dak sendakba nung NATO züngsemtem sensaksemogo. Germany amala züngsemtemi ashiba agi, military ya civilian aser democratic tazüokba kübok alitsü nüngdakba amala tinyaktsütem kar benokogo.

Lithuanian yimtiba nung senden amenba mapang Ukraine nem kechi amala maongka ka agütsütsü iba indang mejangjai

aser Zelenskyy-ia Russia den rara teyalong nungbo Kyiv NATO nung medentetsü ta shiogo.

Ukraine NATO nung denra jenjang tesashi agütsü ta Russia tir Vladimir Putin-i amokmerenogo.

Zelenskyy Turkey-i o sensaksemba ya Kremlin-i kanga janga repranga atago, shirnoki Turkey lenir den tesedaktep yanglua parnok alima kintemi sentoker aliba nungi tongpoka tugutsü meranga liasü.

Erdogan-i, pa ya Kyiv aser Moscow na yongtsü air ka ama sayutsü merangogo. Pai Russia den shishilembaba tsütsü jenjang ajungketshiogo aser kasa mapang nung Ukraine nem drone aser tanga hadirtem agütsüogo aser iba ajanga Russia nung sepaitemi rara tenzükur mezüngbuba hopta Kyiv atsüngtsü nungi nokdangteta liasü.

Turkey lenir yagi linük ana tsüngda yimjung asoshi sensaksemstü atema ayongzuka arudar, ajisüaka Ukraine NATO nung dendaktsütsü atema pusemba ajanga Putin mepeladaksütsü akok.

Erdogan-i ashiba agi, Putin-i taruba iya Turkey semdangtsü aser pa aser Russia tir na Russia aser Ukraine na tsüngda tepuokertem melenteptsü asoshi sensak asemstüakok, koba taoba mapanga Erdogan-i achayanga inyaktepogo.

Erdogan-isa, taoba kum Ukraine nung rongtem Black Sea rongnendak nungi jangotsü bener linük balalai aotsü atema tenangzüktepba yanglur aliba ya atsülangshitsü atema Putin nongshitsü ta ashi.

Russia-i tenangzüktepba yanglushitsü atema memulungra iba tenangzüktepba ya July 17 nü tembangtsü.

MENUNGRA BILEMTETER ASÜR TSÜKJEMRENLA

Nai onok iba lima nungi toktsür or, kum ka ajungba anogo nung, nü tamang sarasadem to teti onoki temulungjang nung tenoka yua mamateter. Anogotem ka sülen ka ta süi-a oaka nü sarasadem ola onok narong nung teti angashir. Akumliri ne O menungra bilemteter aser kotak nungi nai onok teti ajizuka yokdar ta onok tamang teimla.

-Temiim Chirnur, Anükamo, Semchisemnur aser Kinungertem



PELABA



Asür Lenir (Tajung) Kechu
04/11/2007-24/06/2023

Jabaso asür Lenir (Tajung) Kechu asukhu mapang sarasadem, nuphuaser rongsen agi ozü kibong nugita yariba asoshi kiyonger, arogopurtem, tembartem, yimer-yimsanger, aser anuk-apang ajak dang Tsüngrem tenung nung kanga pelaba metetdaksür. Talisa, item telok aser kibong tem dang pelaba shisemnur:

District Hospital, Dimapur
Signal Angami Kiyonger/telok, Dimapur
Dimapur Ao Baptist Arogo
Oriental Theological Seminary, Students & Alumni, Dimapur
Hope Academy, Students & Parents, Dimapur
Khensa Senso Telongjem & Telok Palalatem
Mongsenyimti Tetsu-Tamo & Anuk-Apang
Chuchuyimlang Town/Chuchuyimlang Tetsu-Tamo & Anuk-Apang
Longkong Tetsu-Tamo & Anuk-Apang
Sisterhood Network, Nagaland
Dimapur Area Arogotem
Nagaland Baptist Church Council
Self Employed Women Association, Nagaland
North East Network
Mokokchung College of Teacher Education
Er. Sentimeren & Atenla, Khensa
Mr & Mrs Sashi & Alila, Longmisa
Mr & Mrs. Senti & Arenla, Merangkong
Tsüngremi nenok ajak alia moajangma.

-Temeim Otsu, Kibong, Kinungertem.

PELABA LEMSATEPER



Aso: 1936 - Asü: 05-07-23

Onoki teti meima aliba Tsürabur asür Lanutula Tzüdir (Molungkimong) La shirangpa yipten nung aliba mapang nungi la akümlü doktsüba anogo tashi nung ozü molung zürep jashi nung alidang lokti balalai rongsen, nüpu aser sarasadem agi nungita yariogo, nenok ajak dang kangasa pelaba lemsateper.

1. Dimapur Molungkimong Senso Telongjem
2. Dimapur Molungkimongtsür Telongjem
3. Ao Baptist Church Diphupar
4. Diphupar Ao Senso Telongjem

Iba dak alaka kija aser kibongtem kwikati ozü tejashi khuret nung alidang rongsen, nübu aser sarasadem agi nungita yariogo nenok ajak dang kangasa pelaba lemsateper, nenok mapa tajung asoshi tulusang Tsüngremi talubosa moajangma ta ozü sarasadem.

-Temeim Chirnurtem aser Kinungertem.

Paris St Germain-i Manuel Ugarte alizükogo

Chiteni/July 8, 2023 (Agencies): Paris St Germain (PSG)-i, Sporting Lisbon nungi Uruguay nung asayar Manuel Ugarte euro million 60 agi alizükogo.

Defensive midfield nung asayasang den küm pongu atema tenangzüktepba yangluogo, ta club sangdong ka ajanga metetdaksü.

PSG-i Ugarte alizükba osang ya club anapronglai Hokolbarnü metetdakja liasü.

Ugarte ya sempet tajung aketba asayar ka lir aser pa

arishi küm 15 asüandang Uruguay nung CA Fenix first-team nungi asaya liasü. Iba sülen pa Portugal-i oa Famalicao nung aden aser iba sülen Sporting Lisbon nung dena liasü.

Arishi küm 22 tain asayar Ugarte ya international jenjang nunga Uruguay team nungi tiben asayaogo aser pa taoba küm Qatar nung World Cup atema team nung züngoksema liasü.

Club taseni aoba indang jembiba mpang Ugarte-i, "kü indang career nung iba amala club tulu ka nung jenjang tulu ka

agitetba atema kanga pelar. Ni Paris Saint-Germain atema takokba tashi tajungtiba asayatsü," ta ashi.

Inter Milan nungi centre back Milan Skriniar aser Real Madrid nungi forward Marco Asensio alizükba sülen tang PSG puri Ugarte alizükogo.

Team akangshiba dang masü saka PSG-i tawa Christophe Galtier mapa nungi anentsüba sülen taoba Barcelona aser Spain coach Luis Enrique team indang head coach asütsü atema shimogo.

Canada Open: Sindhu aser Sen na semifinal tongogo



Sindhu & Sen

Chiteni/July 8, 2023 (Agencies): India tsürtem ronnungi nungtugu badminton asayar PV Sindhu-i Canada Open quarter final nung China tsür Fang Jie koka semifinal tongogo aser kasa mapang nung tebur kija asaya nunga Lakshya Sen-i kanga meranga asayar Germany nung asayar Julien Carraggi koka semifinal tongotogogo.

Commonwealth Games champion Sindhu-i quarter nung Fang Jie amokbanger asaya-a asaya 21-13 21-7 agi ayong ayonga koka liasü. Tena tsüngda pezübenbuba asayaba sülen Sindhu-i tang mezüngbuba Fang madak takok ngutetogo.

Olympics nung medal ana tashi ngur alila Sindhu taküm junga masayatei arudar aser tang meyiper junga asayatsü merangba mapang ka lir.

Taküm küm tetenzüklen yiruba sülen arishi küm 28 tain asaya ya junga masayatei arudar aser taküm la asayamung aika nung mezüngbuba aser tanabuba round nung tsüka liasü.

Semifinal nung Sindhu, Japan tsür world number one asaya Yamaguchi den asayatsü.

Sindhu aser Yamaguchi na tsüngda tang tashi nung 24 ben asayar lir aser Sindhu-i asaya

14 koka la tejakdang lir. Taküm küm tetenzüklen tena Singapore Open nung asayaogo, koba Japan tsürla yagi koka liasü.

Quarterfinal asaya tetenzük nungi Sindhu-i tajungba asaya aser la 5-1 ta point 4 agi tejakdang aküm. Sindhu-i lai kanga junga asayaba smash aser drop shot tem asaya aser China tsürla nem timtem agüja liasü.

Kasa mapang nung Fang Jie-i aibelen aika menaba ajanga la nem maongka agütsü aser la 11-6 agi tejakdang aküm.

Iba asaya ya Sindhu-i smash ana atonga maloktsür tembanga liasü. Fang-ia takok tashi aibelen mesüi asayatsü merang ajisüaka alizüng metongtet.

Tebur kija asaya quarterfinal nung Sen-i kanga meranga asayarang Germany nung asayar Carraggi koka liasü.

Iba asaya ya pai 21-8 17-21 21-10 agi koka semifinal asayatsü asoshi maongka ngutetogogo, kong pa Japan nung fourth-seeded asayar Kenta Nishimoto den asayatsü.

Sen aser Nishimoto na tang tashi nung anaben asaya lir aser tenapronglai asaya koka lir, anungji Calgary nung tena tsüngda asaya ya jangrademtsüka asütsü imlar.

Mkg nung inter-ward volleyball tournament Aug 9-11 asayatsü

Mokokchung, 8th July (TYO): Mokokchung nung 2nd Inter-Ward Volleyball Tournament 2023 taruba ita August 9 nungi 11 tashi Multi-Purpose Sports Complex, Mokokchung nung asayatsü lemtetogogo, ta tanü July 6 nü iba asayamung ayonger Kumlong Sporting Association (KSA) ketdangsurtemi Hotel Metsüben nung osangbener senden ka nung metetdaksüogo.

Iba asayamung ya tongtibangsa Mokokchung town nung lanur volleyball janngarrem nem sabang lapokja pei sempet arangshidaksütsü aser ajungshitsü mangdang yur ibai running trophy ka ama yaküm küm nungi ayonga akar, ta Organizing Committee Convenor, Dr. Imlinichet Imchen-i metetdaksü. "Iba ajanga lanur tajung karbo adokdaksütsü onok mangdang lir", ta pai ashi.

Janngratemtsü kaji, iba asayamung nung shir teloki mezüng jenjang ajangzükdir par telokji tsükdangradang kecha melii indang-indanga Master Imchaba Nagaland Open Volleyball Trophy nung shilem agitettsü. Iba dak sentakba nung tayonger KSA o Mokokchung District Volleyball

Association (MDVA) na tenangzüktep (MoU) ka renema lir aser iba asayamung nunga MDVA-i technical maparen balala nung yariteptsü, ta pai ashi.

Taküm mapa tasen kaji, "Super Spiker" ta asayamung lenla nung tetoktepba ka akatsü aser ibaji shilem agir telok rong nungi tejangrar kar nem shilem agitsü maongka lapoktsütsü aser iba nungji takoker senpettsütsü, ta paisa shisem.

"Iba asayamung yabo Mokokchung town nung alirtem atema dang asütsü aser iba dak sentakba nung onoki temetetsü (criteria) kar renema lir aser itemji ward yimdentem den angatettepa inyaker", ta pai ashi. Yaküm team 9-i shilem agia liasü saka takümbo iba dang teimba arutsü imlar, ta paisa shisem.

Iba asayamung shibai bendir trophy den kulikaket aser sen 30,000/- (thirty thousand), aser atongdakba (runner-up) nema trophy den kulikaket aser sen 20,000/- (twenty thousand) agütsütsü. Nija/juri senpet best setter, best spiker aser player of the tournament shima senpettsütsü.

Iba asayamung ya league-cum-knockout yimya nung

asayatsü. Tenung züluokba taah (Registration fee) team shia senpak 1500/- alitsü. Tejangrar team atema form tanü nungi agütsütsü aser form meyiptsütsü atema tesüsabuba anogoji 29th July, 2023 asütsü. Kari danga iba asayamung dak sentakba nung osang tejangjaba metetnürä item number (08974742104/08837066465) ajanga tayongertem tongtettsü.

Yaküm iba asayamung Sungkomen Ward-i bena lir aser Artang Ward pur tanabuba jenjang nung liasü. Asayamung mapang aya tzürartem atema multi-purpose sports complex nung süngo den chiyungtsü tapu balala ayokdak lapoktsü.

Kümlong Sporting Association (KSA) ya 2016 küm Kumlong Ward Yimden akhüm kübok tentet. KSA ya tongtibangsa lanur saisapongertem ajungkettsü nükjidong yur tentetba lir. KSA tenteter külen nungi Mokokchung district telongtet nung saiapong sentong balala nung shilem agia lanur sempet aketertem ajungshia aser parnok nem sabang lapokja arudaki aser item rongnung Inter-ward Volleyball tournament ya-a nükjidong den sütepa ayonga akar.

MTBA Youth Department-i football coaching clinic ayongzük



Mokokchung, 8th July (TYO): Mokokchung District Football Association aküm nung Mokokchung Town Baptist Arogo Youth Department-i ayongzüka Mokokchung nung lanurtem atema football coaching clinic sentong ka hopta asemnü June 19th nungi July 8th, 2023 tashi kaogo.

Iba coaching sentong ya tetsür o tebur arishi küm 10 nungi 14 tashi pur atema liasü

aser coaching telemsa asem küma lemsar agi. MTBA Youth Department-i football luyim tsütsü lanur sempet aketertem ajungmesotsü nükjidong nung iba sentong ya ayonga akar.

Iba coaching atema lanur 134-i tenung züluok aser item rongnung parnok 96 (tebur - 80 aser tetsür - 16)-i tatem tongteta liasü aser coaching nung shisa len sayurji certified coach parnok 12 liasü.

Iba coaching tatembang sentong nung Col. Rahul Gurung, Kirti Chakra, Commandant 12th Assam Rifles tetushi tesemdang liasü aser pai iba sentong nung jembidang, saisapongertem taküm ka asoshi tazüokbaji kanga tongtibang lir, ta ashi. Paisa MTBA Youth Department-i lanur sempet aketertem ajungshia iba ama mapatong tajung atongba asoshi pelaba lemsatet.

Pakistan PM-i high-level committee ka tentettsü

Chiteni/July 8, 2023 (Agencies): Taküm India nung asayatsü aliba ODI World Cup nung Pakistan team shilem agitsü atema telemtetba ka agitsü asoshi Pakistan Ato Kilonser Shehbaz Sharif-i high-level committee ka tentettsüogo.

Iba committee ya Foreign Minister Bilawal Bhutto lenisüba nung inyaksangshitsü aser parnoki Pakistan aser India na tesendaktep nung lenla balala, saisapong aser policy balala bendanga ayutsüba dak sendakba nung sorkar tamendakdak aser asayar, ketdangsurtem, fan tem aser media dak sendakba nung India nung tensa koma ali iba indang

asadangtsü.

Committee-i ken o balala asadangba sülen Ato Kilonser Sharif nem osang agütsütsü, shiba Pakistan Cricket Board (PCB) patron-in-chief lir.

October 5 nü nungi tenzüka Pakistan team iba asayamung nung shilem agitsü timla nung International Cricket Council (ICC) aser Board of Control for Cricket in India (BCCI) nati World Cup mapanglem sangdongogogo, ajisüaka national team iba asayamung nung shilem agitsüba ya sorkar telemtetba dak keta lir, kechiyong linük ana tesendaktep mejungi lir ta PCB-i ashi.

BILEMDANGANG

"Mapa inyak dang alar ama inyakang aser chiyong dang chuba ama chiyongang."